

中年縣志

巽

贊

至聖先師孔子贊

清聖祖仁皇帝

蓋聞三才建，而天地不居其功，一中傳，而聖人代
宣其蘊，有行道之聖，得位以綏猷，有明道之聖，
立言以垂憲。此正學所以常明，人心所以不泯也。
粵稽往緒，仰邇前徽，堯舜禹湯文武，達而在上，
兼君師之寄，行道之聖也，孔子不得位，窮而在下，
秉刪述之權，明道之聖人也，行道者動，業炳於
一朝，明道者教，思周於百世，堯舜禹湯文武之後，
不有孔子，則學術分清，仁義湮塞，斯道之失傳

也久矣。後之人欲探二帝三王之心法，以為治國平天下之準，其奚所取衷焉，然則孔子之為萬古一人也審矣。朕巡東省，謁祀闕里，景企滋深，敬搗筆而為之贊曰，

清濁有氣，剛柔有質，聖人參之，人極以立，行著習察，舍道莫由，惟皇建極，惟后綏猷，作君作師，垂統萬古，曰惟堯舜，禹湯文武。五百餘歲，至聖挺生，聲金振玉，集厥大成。序書刪詩，定禮正樂，既窮象繫，亦嚴筆削。上紹往緒，下示來型，道不終晦，秩然大經。百家紛紜，殊途異趨，日月

無踰，美牆可晤，孔子之道，惟中與庸，此心此理，千聖所同。孔子之德，仁義中正，秉彝之好，根本天性。庶幾夙夜，勗哉令圖，溯源洙泗，景躅唐虞。載歷歲除，式觀禮器，擣毫仰贊，心焉趣企，百世而上，以聖為歸，百世而下，以聖為師，非師夫子，惟師於道，統天御世，惟道為寶。泰山巖巖，東海泱泱，墻高數仞，夫子之堂。孰窺其藩，孰窺其徑，道不遠人，克念作聖。

戶部尚書文華殿大學士臣張玉書奉敕敬書

康熙二十五年七月初四日上浣之吉

太子少保張公像贊

明李廷機

緇衣而素履圓用而方體而息深深而度几几與終日談
無譽毀與徑年處無慢侈冬日趙衰春風伯子周鼎商彝
不施績采璞玉渾金不事剝削故仕若千仞之山陟則崔
嵬而進則迤邐福若萬頃之浸浩無津涯亦混無終始斯
非天地之中具茨洛之區鍾粹毓和蔚然而起者耶

恕行堂贊

婁躋壽

恕恕恕，不恕何以盡人事。行行行，不行何以能有
成。恕則近仁，心德日純。行之無倦，不留缺陷。

賦

籍田賦

潘岳

伊晉之四年正月丁未皇帝親率群后籍於千畝之甸禮也於是乃使甸師清畿野廬掃路封人墳宮掌舍設板青壇蔚其嶽立兮翠幙默以雲布結崇基之靈址兮啟四塗之廣阼沃野墳腴膏壤平砥清洛濁渠引流激水遐阡繩直通陌如矢總括服於縹輓兮紺轅綴於黛耜儼儲駕於塵左兮俟萬乘之躬履百僚先置位以職分自上下下具惟命臣襲春服之萋萋兮接游車之鱗鱗微風生於輕幘纖埃起於朱輪森奉璋以階列望皇軒而肅震若湛露之

晞朝陽眾星之拱北辰也於是前驅魚麗屬車鱗萃閭闔
洞起參塗方駟常伯陪乘太僕秉轡后妃獻種稔之種司
農撰播殖之器挈器掌升降之節宮正設門閭之蹕天子
乃御玉輦蔭華蓋衝牙錚鎗綃紈絳縹金根照耀以炯晃
兮龍驥騰驤而沛艾表朱元於離坎飛青縞於震兌中黃
畢以發暉方綵紛其繁會五輅鳴鑿九旌揚旆瓊釵入禁
雲罕掩藹簫管朝嘒以啾嘈兮鼓鞀磁隱以砰磕筍虞疑
以軒翥兮洪鐘越乎區外震震填填塵鷲連天以幸乎籍
田蟬冕頰以灼灼兮碧色肅以芊芊似夜光之剖荆璞兮
若茂松之依山巔也於是我皇乃降靈壇撫御耦游場染

屢洪縻在手三推而舍庶人終畝貴賤以班或五或九於斯時也居靡都鄙民無華裔長幼雜處以交集士女頌斌而咸戾被褐振裾垂髻總髮躡踵側肩倚裳連襪黃塵為之四合兮陽光為之潛翳動容發音而觀者莫不忭舞乎康衢謳吟乎聖世情欣樂於昏作兮慮盡力乎樹藝靡誰督而常勤兮莫之課而自勵躬先勞以悅使兮豈嚴刑而猛制之哉有邑老田父或進而稱曰蓋捐益隨時理有常然高以下為基民以食為天正其末者端其本善其後者慎其先夫九士之宜弗任四人之務玉野有菜蔬之色朝靡代耕之秩無儲穡以虞災徒望歲以自必三季之衰皆

此物也今聖上昧且丕顯夕惕若慄圖墮於豐防儉於逸
欽哉欽哉惟穀之恤展三時之宏務政倉廩於盈溢固堯
湯之用心而存救之要術也若乃廟祧有事祝宗諏日蠶
簋普淖則此之自實縮鬯蕭茅又於是乎出黍稷馨香旨
酒嘉粟宜其民和年登而神降之吉也古人有言曰聖人
之德無以加於孝乎夫孝天地之性人之所由靈也昔者
明王以孝治天下其或繼之者鮮哉希矣逮我皇晉實光
斯道儀刑乎於萬國愛敬盡於祖考故躬稼以供粢盛所
以致孝也勸穡以足百姓所以固本也能本而孝盛德大
業至矣哉此一役也而二美具也不亦遠乎不亦重乎敢

作頌曰 思樂甸畿薄採其茅大君戾止言籍其農其農
三推萬方以祇耨我公田實及我私我簋斯盛我簠斯潔
我倉如陵我庾如坻念茲在茲永言孝思人力普存祝史
正辭神祇攸歆逸豫無期一人有慶兆民賴之

秋興賦并序

潘岳

昔十有四年余春秋三十有二始見二毛以太尉掾兼虎
賁中郎將寓直於散騎之省高閣連雲陽景罕曜珥蟬冕
而襲紈綺之士此焉遊處僕野人也偃息不過茅屋茂林
之下談話不過農夫田父之客攝官承乏猥廁朝列夙興
晏寢匪遑底寧譬猶池魚籠鳥有江湖山藪之思於是染

翰操紙慨然而賦於時秋也故以秋興命篇其辭曰 四
運忽其代序兮萬物紛以迴薄覽花蔕之時育兮察盛衰
之所託感冬索而春敷兮嗟夏茂而秋落雖末事之榮悴
兮伊人情之美惡善乎宗生之言曰悲哉秋之為氣也蕭
瑟兮草木搖落而變衰慘慄兮若在遠行登山臨水送將
歸夫送歸懷慕徒之戀兮遠行有羈旅之憤臨川感流以
歎逝兮登山懷遠而悼近彼四感之疚心兮遭一塗而難
忍嗟秋日之可哀兮諒無愁而不盡野有歸燕隰有翔隼
游氛朝興槁葉夕殞於是乃屏輕箑釋織絺藉莞蒹御袷
衣庭樹撼以灑落兮勁風戾而吹帷蟬嘒嘒以寒吟兮雁

飄飄而南飛天晃朗以彌高兮日悠揚而浸微何微陽之
短晷覺涼夜之方永月腫朧以含光兮露淒清以凝冷熠
燿粲於階闥兮蟋蟀鳴乎軒屏聽離鴻之晨吟兮望流火
之餘景宵耿介而不昧兮猶展轉於華省悟時歲之邁盡
兮慨俛首而自省斑鬢影以承弁兮素髮颯以垂領仰群
雋之逸軌兮攀雲漢以遊騁登春臺之熙熙珥金貂之炯
炯苟趨舍之殊塗兮庸詎識其躁靜聞至人之休風兮齊
天地於一指彼知安而忘危兮故出生而入死行投趾於
容跡兮殆不踐而獲底闕側足以及泉兮雖猴猿而不履
龜祀骨於宗祧兮思反身於綠水且斂衽以歸來兮忽投

緩以高厲耕東臯之沃壤兮輸黍稷之餘稅泉湧湍於石
間兮菊揚芳乎崖溼澡秋水之涓涓兮玩游鯈之澈澈道
遙乎山川之阿放曠乎人間之世優哉游哉聊以卒歲

傷民賦

清胡宏度 天門人邑令

中牟之災於旱潦黃河也歷十有餘載矣庚戌夏秋之交
復靈雨彌月益之賈魯之水秋未半沒廬舍亦圯人之殞
於水者比比而西郭之女且斃於牆顛沛之狀不忍見聞
乃感而賦賦曰 牟州在河之濱每患德水衮延不逮十
舍版籍多於千軌其南紛穰沙磧回抱如隄坎之復聚塵
袞莫施其北鑿畱理腴腴原陞歛齷齪以皜皜或鹵澤以

汜汜廢畷之良耜思或昧而憂悒西則新荒於沙東則
常苦於濕牟之地亦不利於民矣旱魃趁暴於先馮夷流
毒於後雨暘不時風多怒吼是復不遇於天地也於是覃
澤遠敷四野濡沃興築浚之役而口藏復留畜之賦而不
錄大事鍼砭盡起民瘼靡佗際而怔忡深感惕而力作是
以管之日未嘗專逢掣曳而入於惡也胡為悲鳴田翁牧
豎復業幾何今復淫雨爾其如注也則崩礧震震醜震震
零二氣薄感威益豐隆霓霓黻黻雲滄自東猗颯助雪騰
颺其中霏霏霖霖莫知所終連妖氛韜紅霞阻羲和之御
蒙纖阿之車周一月以曠霏漲金水而咨嗟引鷓首於擘

粼波澆澆以無涯漂黃團於浪裏樂白水於凹窪圯墮埒
以千堵沒茅茨以百家若乃吉貝蔽而脫相菽荅黠而匙
蕪蕪釁芑穉粹經澗澗春以沈壓秆秆杭杭糶糖稭還錢
敵乎飄颻粉視罔積秉筥不納醕或見其捧壻難繼其涸
沓沙不可羹奚戒毋蹙魚不餌於漭沈鼃入夜而閣閣至
若卷滄沚以奮邀湏慮長而頻覆泣徽黧於波心葵白徒
於魚腹促節而往與流永漲零零暫息零零滴屋驕春箔
續聲淩裂竹觸者憊於奏力乃銷骨而判肉之子歸寧溘
然不祿何雨之殃民較去日而毒也傷民核惜羈客恓悲
望漉漉之不竭心翬翬以縈思出蒸庶於沈溺登王道以

坦狹此放廢所不及而賢宰其在茲乎

以蟲鳴秋賦以題為韻

清閻克恭

邑舉人

秋色千村，秋風萬里，秋樹雅嘯，秋邊雁起，蟲鳴
四壁以清唵，蟲弄數聲而未已，覽古牆兮霜白，韻
透籬邊，伴老屋兮燈紅，魂驚夢裏，涼添礎杵之音
，響雜笛箏之技，增客愁於山空夜靜，不勝悄然，
發天籟於月落參橫，亦良有以。當夫盧家練白，竇
氏錦紅，天寒料峭，漏響丁東，澈風雨兮滿城，濤
翻古柏，搖藤蘿兮半砌，韻和疎桐，胡為乎來哉，
嗟疑鉄笛，此非惡聲也，冷到簾櫳，有時嘉客棋敲

，酒未傾夫緣蟻，幾度幽人籬坐，絲曾吐愛青蟲。
已而空庭葉落，老圃煙橫，螢流竹徑，蛾散蘭檠，
天假蟲而苦吟迭奏，蟲入夜而逸韻倍清，寒來暑往
，夏去秋迎，時開蟋蟀之堂，傷懷遲暮，小坐蠨蛸
之戶，入耳分明，斷續因風，莫名其妙，愀悌滴露
，誰使之鳴。於是琴牀似洗，竹榻勾留，聆秋聲兮
激切，動秋意兮含愁，斗室之杼機雜軋，井欄之絡
緯依猶，油燈暗燼，殘月成鉤，添來對酒之歌，樓
前瞰遠，催動搗衣之韻，塞外驚秋。則有詩客蓬廬
，征人驛路，愁思凝神，秋懷驚寤，魂銷戶外金風

腸斷林梢玉露，微蟲雖無知者，直同雁信之遙通，
悲鳴其有意乎，感切龍城之古戍，而况乎少婦閨紅，
，迴紋尺素，盼殘破鏡之重圓，悵望閒階而徐步，
鳴聽東壁，應停梭織以含顰，秋老北庭，思唱刀環
而作賦。

朱固村賦以牟陰勝地東北名區為韻 闔克恭

名高東漢，勝據中州，金堤環抱，玉水安流，坐古
時之浦口，盼朱固之灘頭，固圉不資堞雉，固防永
峙土牛，黃壤宏開，家絃戶誦，紅塵不染，地靜人
幽，接瓦子之東坡，應化汴城文物，映迴車於西嶺

夙霑聖道盧牟。原夫村之以朱固稱也，嘉名肇錫，古蹟搜尋，原圃人結廬攸處，朱相公隱士共欽，擬釣餌於嚴陵，清風亮節，卻聘書於光武，道骨仙心，漢皇而恩深一飯，河伯則浪息千尋，闔樓北峙，譚寨南臨，農桑留皇古衣冠，宜俗宜雅，香火降春秋報賽，臭陽臭陰。當夫春日融和，春風遊興，柳陌烟霏，桃花浪瑩，聽鶯携酒，愛傾詩客之觴，驅犢揮鞭，恍入仙源之徑，釣流水則放棹興歌，步長堤而奪芳持，贈學堂祭菜，家家與古為新，老圃澆蔬，處處引人入勝。已而夏樹濃青，夏峯滴翠，

朱仙鎮避此清幽，朱山人後茲深遠，村名桑苧，千家而燕笑臚歡，固若金湯，四塞之龍沙蒼翠，堡房則柳垂帷幙，別有洞天，古廟而柏聳雲霄，允稱福地。未幾一天秋露，三徑秋風，殘花餘紫，落葉堆紅，腰鐮分新月之光，蟬鳴穫稼，荷担忙夕陽之路，扈促農功，綸影一竿，網赤鱗兮乙尾，田歌四起，聽紫韻兮丁東。亦有冬冷坐裯，冬烘硯墨，書映月光，笠霑霜色，圍爐煨芋，田家之笑語何如，沽酒摘菘，野老之情懷自得，寨連永固，兵聞擊拆之聲，里號陶朱，商妙積金之息，人戒浮澆，俗敦耕

織，留心交而飲饌，尊擬江南，介眉壽以稱觥，營
我堂北。况乎高門闕閭，世族簪纓，瑯琊貴胄，上
黨家聲，延陵季子之派支，澤流後裔，魯國叔弓之
喆嗣，侯仰宗初，儒脩學在朱晦翁，勤課芸窗蟻術
，勇爵錫夫固山達，亦垂蓋世鴻名。允宜名稱上國
，地異偏隅，家居廉讓，風近唐虞，如觀三異，如
入五都，若使太史陳詩，續編鄒魯，倘未輜軒問俗
，接踵小邾，朱翁子方此蔑矣，固始侯亦樂此乎，
數百族烟火雲連，無愧仁里，四千年文風日上，獨
擅名區。


祖逖聞鷄起舞賦以題為韻

張鴻遠

氣薄雲天，神驚風雨，嘗永夜以提心，忽中宵而振羽，鷄既鳴矣，聽嘹唳於荒城，手則舞之，效婆娑於幕府，數千里華戎雜處，寄慨神州，五十年基業誰扶，感懷烈祖。則有祖士雅者，職典司州，時多強敵，驚夢寐於重衾，撫江山兮半壁，運籌帷幄，豈謝傅之圍碁，勵志憂勤，抵陶公之運甓，竟欲鞭爭先著，許身世以馳驅，何當楫擊中流，播聲威於遐邇。爾乃殷勤報國，慷慨從軍，壯淮南之士氣，備江左之人文，腦膊何聲，頓警心於旦昧，飛騰有

願，欲奮志於風雲，嘗因群逆鷓鴣張，怒焉如擣，豈
敢終宵燕息，置若無聞。惟邈則殷心不寐，入耳如
提，聆司農於堞下，鶯報曉於窗西，敢誤信夫蠅聲
，荒郊月冷，如相驚以鶴唳，野店風淒，願效雄飛
，豈甘心於屈蠖，不為雌伏，輒奮翼於棲鷄。大夢
如呼，應聲未已，乍飛練以縈身，旋迴風而舉趾，
恨不削平寇亂，奮袂能興，誓將掃盡塵氣，揮戈直
指，王事不遑啟處，聽刁斗以先驚，男兒何以為家
。感風飄而思起。迨至石勒氛張，豫州功樹，保障
專司，屏藩夾輔，回憶良宵風景，曾嗷嗷以傳聲，

每思故國山河，輒殷殷於守土，果得出師命將，奏
江上之鏡歌，更當破虜平戎，譜晉家之鞞舞。迄今
仰望風流，馳思雅度，鵲起興懷，鴻飛景慕，警枕
而勵官箴，儲材而雄武庫，士也鷄蹠殫精，鷄鳴啟
悟，竊願聞風百世，往事抒懷，幸當舞羽兩階，昇
平獻賦。



論

悅樂園論學

婁躋壽

今人之學，弊在有空文而無實踐，摘章句，工詞翰，非不憂乎其難之，然難其難，究歸於一無所濟也，若主敬存誠行恕，著實遵行一卷之書，有終身用之不盡矣，如弟子入則孝一章，賢賢易色一章，君子不重則不威一章，但能讀此三章書而力存之，非即聖賢之徒歟，吾嘗謂學者，不必多讀書，但求實踐，以期於有用而已，伊川先生曰，讀得一尺，不如行得一寸，蓋讀書不力行，只是說空話也，竟何

益之有哉。

時論 清光緒十年十月十五日日記 婁躋壽

文以八比詩賦字取士，誤盡天下文人，武以馬步箭刀矛石取士。誤盡天下武人，自有明迄今，幾五百年，而文武兩途無人矣。即如明末，正人止能盡節，小人反去降賊，未見有雄才大畧旋轉乾坤者也。雖王陽明豐功偉績，標炳天壤，要不以八比見長，而其學乃為有用之學。即如我朝左文襄，亦不以八比見長，而削平禍亂，不愧為朝廷柱石。然則文人之八比文章，與武人之刀矛石，果有何用乎，而第

能用之以取功名，功名既得之後，除作文章，別無長處，武者除包娼窩賭，武斷鄉曲，別無技能。是故文武狀元，其名則甚美，其才能反出庸夫俗子下矣。而其所以異人者，不過曰文章也，詩賦之與字也，不過曰馬步箭也，刀石之與弓也，然以詩文字治世，則迂而難行，以刀弓石禦敵，則笨而無濟，天子治天下，必思有以弱天下之民，民弱則易制，民強則難欺，懸之以美名，而使人竭心力以求之，遂驅有聰明者，皆入於詩文字之中，而終身不能出其籠，驅有勇力者，皆入於刀弓石之內，而到底不

能脫其網，所謂範圍天下而不過者，其在此乎。是以朝廷所得之士，有用之才甚少，無用之才極多，迨一有變故，反恨在位多庸臣，試思果誰實使之哉。况開捐是以利誘民也，捐官是因官求利也，於是天下人莫不好利，好名者多，而宇內無奇士，好利者多，而世間皆危機矣。雖民可使由，不可使知，而誤盡蒼生，勢必至終自誤也，豈不重可慨哉。國朝入仕之途有三，科第也，捐納也，保舉也，而要非以多金濟之，則斷不能出仕為官，而非藉勢以維繫之，亦斷不能平穩以保其官，故大清之天下，一

勢利之天下也。即科第一途，名為正途，往往迂謬
呆執不諳世故，為其讀書多而閱歷少也。捐納一途
，為一本萬利之計，往往破產棄業，多方借貸，而
為孤注之一擲，及一官到手，惟思先還債後治業，
欲其不貪民財，不亦難乎。保舉一途，獎有功也，
而有功者或不與焉，而無功者多膺上賞，大抵此一
途，皆奔競夤緣之輩，品行壞而心術險，一旦出仕
，媚上虐下，而民之受其殃者，不可問矣。噫斯弊
也，始於一人之貪利，而遂致千萬人之貪利也，始
於一二人之趨勢，而遂致千萬人之趨勢也，故今日

之官，不必强求，不做官，都是好消息。

四言詩

家風詩

潘岳

綰髮綰髮髮亦鬢止日祇日祇敬亦慎止靡專靡有受之
父母鳴鶴匪和析薪弗荷隱憂孔疚我堂靡措義方既訓
家道穎穎豈敢荒寧一日三省

大堂落成頌

冉覲祖

聶爾牟邑代著循良仰惟漢令偉矣仲康誰其企之見諸
羹牆昔也扶風今也高陽牟俗方頽有弛無張民聽不肅
缺彼堂皇韓侯振興若網在綱鳩庇惟勤革飛在望朴其
丹堊堅其棟梁物不匱竭民樂趣踰踰萬年之基美政遺芳

三異休風聯翩頡頏後賢有作永範斯堂

五言古詩

金谷集作

潘岳

王生和鼎實石子鎮海沂親友各言邁中心悵有違何以
敘離思攜手遊郊畿朝發晉京陽夕次金谷湄迴谿縈曲
阻峻阪路威夷綠池汎淡淡青柳何依依濫泉龍鱗澗激
波連珠揮前庭樹沙棠後園植烏桺靈囿繁石榴茂林列
芳梨飲至臨華沼遷坐登隆坻玄醴染朱顏但慙杯行遲
揚桴撫靈鼓簫管清且悲春榮誰不慕歲寒良獨希投分
寄石友白首同所歸

河陽縣作二首

潘岳

微身輕蟬翼弱冠忝嘉招在疚防賢路再升上宰朝猥荷
公叔舉連陪廁王寮長嘯歸東山擁耒耨時苗幽谷茂纖
葛峻巖敷榮條落英隕林趾飛莖秀陵喬卑高亦何常升
降在一朝徒恨良時泰小人道遂消譬如野田蓬幹流隨
風飄昔倦都邑游今掌河朔徭登城眷南顧凱風揚微綃
洪流何浩蕩修芒鬱岵嶺誰謂晉京遠室邇身實遼誰謂
邑宰輕令名患不幼人生天地間百歲孰能要類如敲石
火譬若截道颺齊都無遺聲桐鄉有餘謠福謙在純約害
盈由於驕雖無君人德視民庶不怵

日夕陰雲起登城望洪河川氣冒山嶺驚湍激巖阿歸雁
映蘭時游魚動圓波鳴蟬厲寒音時菊耀秋華引領望京
室南路在伐柯大厦緬無覲崇芒鬱嵯峨總總都邑人擾
擾俗化訖依水類浮萍寄松似懸蘿朱博糾舒慢楚風被
郎邪曲蓬何以直託身依叢麻黔黎竟何常政成在民和
位同單父邑愧無子賤歌豈敢陋微官但恐忝所荷

在懷縣作二首

潘岳

南陸迎脩景朱明送末垂初伏啟新節隆暑方赫曦朝想
慶雲興夕遲白日移揮汗辭中字登城臨清池涼颺自遠
集輕襟隨風吹靈囿耀華果通衢列高椅瓜瓞蔓長苞薑

芋紛廣畦稻栽肅芊芊黍苗何離離虛薄乏時用位微名
日卑驅役宰兩邑政績竟無旌自我違京輦四載迄於斯
器非廊廟姿屢出固其宜徒懷越鳥志眷戀想南枝

春秋代遷逝四運紛可喜寵辱易不驚戀本難為思我來
冰未泮時暑忽隆熾感此還期淹歎彼年往駛登城望郊
甸遊目歷朝寺小國寡民務終日寂無事白水過庭激綠
槐夾門植信美非吾土祇覺懷歸志眷然顧鞏洛山川邈
離異願言旋舊鄉畏此簡書忌祇奉社稷守恪居處職司
三月三日洛水作

潘尼

晷運無窮已時逝焉可追斗酒足為歡臨川胡獨悲暮春

春服成百草敷英蕤聊為三日遊方駕結龍旂廊廟多豪
俊都邑有豔姿朱軒蔭蘭皋翠幙映洛湄臨崖濯素手步
水褰輕衣沉鈎出比目舉弋落雙飛羽觴乘波進素俎隨
流歸

贈河陽詩

潘尼

處生化單父子奇涖東阿桐鄉建遺烈武城播絃歌逸驥
騰夷路潛龍躍洪波弱冠步鼎鉉既立宰三河流聲馥秋
蘭摘藻豔春華徒美天資茂豈謂人爵多

贈滎陽太守吳子仲

潘尼

大晉盛得人儲宮畜髦士吳侯降高質剖符授千里垂覆

豈他鄉迴光臨桑梓寮類感歧路黎庶思知恥老氏踰小
鱗曹泰寄嶽口無謂敝邑陋覆篲從茲起

祖道畢雍孫劉邊仲潘正叔

陸機

皇儲延髦俊多士出幽遐適值時來運與子遊承華執笏
崇賢內振纓層城向畢劉贊文武潘生蒞邦家感別懷遠
人願言歎以嗟

夕次圃田居

唐祖詠

前路入鄭郊尚經百餘里馬煩時欲歇客歸程未已落日
桑柘陰遙林烟火起西還不遑宿中夜度京水

懷中牟張林宗孝廉

明徐燭閩縣人

驅馬出京邑遊子思故鄉秋氣正肅瑟白露為青霜言念
同心人送我河之梁中懷轉於邑別緒重慘傷洛城遠迢
遞閩海何蒼茫睽離歷年歲隔越成參商寒蟲倏夜語哀
雁方南翔感此不能寐鬱鬱煎愁腸圃田在何許萬里徒
相望

哀李烈婦王氏

莫舜龍 山陰人邑丞

草木有枯菟不改惟青松婦節松堪比衾穴矢相從王氏
生田舍貞淑性所鍾歸李操井向北堂足朝饗盂田敬如
賓遠躡古人蹤鸞鏡忽分張茹藥稱未亡鷓啼春月破雁
唳秋夜長殘燈照孤影黯馬神慘傷阿姑利多金通媒議

嫁傭兼之父貪餌往愬反受搶冒雨歸其室長號籲彼蒼
抱兒淚涓涓死別誰復憐引刀恨不死深夜赴井泉吁嗟
紅顏婦義不負所天執玉懼微玷殞身求自全身死心不
沒名與山河傳

挽劉烈婦姚氏

清胡宏度

吁嗟姚氏女伉儷事劉郎日奉姑璋孝事親并向良賢勞
聞閭里倡和叶鸞凰兩載恩情洽一朝夫婿亡胸橫愁百
結淚滴血千行覽鏡惟孤影衣身盡皓裳風吹連理木雨
斷九迴腸賦性同金石捐軀向攏梁冥中歡會杳墓側挽
歌長皎皎清秋月淒淒午夜霜飄然無異志逝矣有餘芳

我欲標貞烈吟成轉可傷

列子祠

桑調元浙江人

我生亦好遊獨任意汗漫先生口性熟脫棄陳跡踐官粟
不妻子野屨只里閑言類接輿狂形異琴張慢窮老隱深
霧元豹無人見圃外度靈風拂水冷然善

辛母朱孺人節孝詩

婁光原武人進士

兩間無節義奚以振綱常天上無旌表誰知潛德光惟茲
松柏操姓字有餘芳生死何難易苦甘詎較量賢哉辛母
節守義稱未亡誓水生前笑茹藥苦備嘗為難不為易願
期九原償堂上頭已白藐孤口正黃繼慈年六十起居賴

扶將荻畫杆邊月提撕慄義方鹿鳴幸早達麟趾兆家祥
胡為溘霜露枯捲抱慘傷辛母庶無憾泉下慰三喪銘德
詩裁錦褰魂丹鳳翔我來一荐藻壺範仰周行歎息不能
已清芬馥古香

石橋決口紀實

婁躋壽

黃河潰長隄濁浪齊湧出飛奔向東南水頭高數
尺驚慌片時間村落忽馬失一派水流聲迅如
萬馬逸長林露樹梢急溜見浮尸水勢抱城來
中牟成澤國分屯各城門時時懼衝決人心亂如
麻西城已崩裂欲逃未有船眼看生路絕東關

地勢高 群集關廟側 紛紜無數人 擁擠不嫌窄
城內餘數家 危亡在旦夕 平地皆出泉 四隩水洋
溢 柴米無路通 焦愁見於色 頻覆浪中舟 往來
慮不測 時聞風怒號 中情殊驚怯 登城四望遙
長天與水接 塚棺逐水翻 令人心酸惻 高岡為深
潭 溝渠頓壅塞 嗟此一方民 同時罹浩劫 倘不
速合龍 萬姓無遺孑

勸學詩

婁躋壽

讀書貴自強 讀書貴立志 貧賤不讀書 貧賤長已
矣 富貴不讀書 富貴安可恃 愚魯不讀書 何以

開其智 聰明不讀書 美才終自棄 莫道讀書難
一勤無難事 先要收放心 下帷息百慮 生書要讀
熟 熟書要常記 留心看講書 尋究書中義 書理
皆明通 方可學時藝 字學今所尚 臨帖勿免戲
字體要端正 結構要緊密 心以用而靈 氣以養而
銳 但有十年功 定博朱紫貴

勉子弟詩

婁躋壽

舜蹠分途處 須防一念差 浮文安足貴 實踐洵堪
嘉 孝弟端其本 祥和裕乃家 規模崇節儉 習尚
戒豪華 守拙休嫌陋 揚名未可誇 半耕還半讀

珍重課桑麻

孝弟勤儉只此四字便是真學問便是好家法無事
他求也

賈魯河

薛正清

去河僅咫尺 南入汝漢海 千里豈不遙 朝宗志有
在 永長堪容舟 舟人呼款乃 夾岸柳條長 春深
曳翠彩 日夕步平沙 風浴同寮案 清流共相矢
庶幾無尤悔

七言古詩

登岳陽至中年懷臺省諸君子

明胡纘宗

臺省翼翼臨大河諸公賞雪情若何今年瑞雪亦既足明年瑞麥定復多錦瑟瑤琴動四筵請聽白雪房中歌一倡一酬月忽出月光雪色流金波我來梁國春已動欲和陽春裁輕羅賞春宜與賞雪異但願攜酒朝鳴珂賞春賞雪豈在酒且看嵩岳青嵯峨

皂角菴贈三明上人

先太保垂髫時手植今合抱矣

張民表

皂角樹高三十尺孤踪靜倚心如石焚香禮佛話無生我願與師數晨夕

尋潘安仁墓同徐存永張子振徐聖藻王祚昌

涇陽人

秋陽午過涼颺起登城野望山烟紫西郊灌木遍岡巒荒

原孤塚何纍纍爭傳墓側有安仁景悅流風若未死四人
乘興出閨闈散步林泉尋故址寂寂村墟遺後人老叟聞
名驚相指一邱隱伏傍沙眠棘薪環列叢如囂白楊古樹
風蕭蕭莪花滿縣曾餘此落籜疑聞蕪筆聲鸞鳳和鳴賦
未已可有當年袖果姬還來執得桃與李才人可久是芳
名千載憑弔偏自喜

庚子仲夏過中年謁香為宗兄明府喜邑志新成擬
古頌之

吳宸誥福建人

邑志攸關通記室納貢陳風胥吏律豫野提封最圃田新
王懷古還稽實知君史紀足三冬上掩南狐下蔚宗抵任

纔將鵠眼拭中丞已指切猶龍憲行嚴促遑辭瘁忌緣粉
本充全義矧當兵燹十番餘巨貲求購無完字以身作獻
具能文秘書肉譜括方聞川原高渺隨心出人物湊繁較
品分天邊曦馭曷長杲地下劫灰經幾掃陵祠宮廟悉荆
榛王侯將相復誰保昔有令無事孔傷昔無令有制須詳
忠孝貞廉魂不替青猿白馬水山鄉梨棗秋風清且冽此
道尋真案如鐵但秉夷齊不易心何避桓奸門戶說口口
言與相衡舛升沉品類奕時觀等君政媿應奚似頡頏魚
頭子氏潘德行文章往並勗斑管金銀仿古錄讀書之日
恥書生作吏之時嗤俗吏茲志成時神鬼驚向誰論討向

誰評與圖貢賦如椎畫詩賦誅銘感六丁閱歲甫周三百
度森然珠玉駢章句總由別集彙前賢却乃胸中罔顧數
國門懸置賞千金呂氏當年疇嗣音豈弟宏才備虎觀多
應聞望越雞林

不愧教職歌贈學博宋先生 冉覲祖

國家養士七十年煌煌功今日星懸慎選碩儒端師範本
為鸞鳳非鷹鷂比來學校漸榛蕪名教墮地誰仔肩饑饉
游臻逋賦積多士劬勩廢簡編追呼頻煩胥役惡繩加士
頸奮老拳繫獄加朴勢不已士氣萎荅詆堪憐先生筮仕
主牟庠考藝觀德鐸音宣目擊時事發浩歎力噓枯槁使

蕃鮮每為貧士代完租慷慨不悟橐中錢獄者釋兮扑者
宥委曲營救總安全不作妾婦取容悅豈效青蠅趨腥羶
孤琴獨撫無與和宿齋靜攝擁寒氈自念先世清白吏身
居師席豈徒然加意培植無戕害不愧教職斯為賢子忝
史臣職載筆矢公揚善贈此篇將來採錄入史乘留與學
宮百代傳

傷田家

紀壬寅河決
也時家萬勝

冉覲祖

中牟從來地苦磽半是黃沙半是茅日夜勤勤輸公府豐
年不辦朝夕看今歲禾黍鬱芊芊河水突至盡成川展轉
自傷還自慰爭道河水可肥田河水日長無止期噴來黃

沙沒腰肢父老曾憶前朝事嘉靖年間似此時一十八水
變為沙父子攜持歎仳離哭聲干霄不可聞九閭杳杳那
得知屈指今昔無多日不謂河水復如茲欲留已無餬口
具欲去誰能一葦渡長跪合辭告河伯河伯暫爾斂狂怒
但令有路置此土付與河伯任傾注

題黃烈婦許氏

冉覲祖

飛瓊只合瑤池住幻出銀河雙星渡雲中彩鳳羽翮垂藥
餌竟作齊眉具五載霜閨稱未亡幾回腸斷黃鸝白芳魂
已逐素練颺鬱鬱原頭連理樹

東南城上魁樓落成

許嗣衡邑人庠生

為攬魁樓勝試作魁樓歌
牟陽自昔人文地馨傳前輩掛
魏科曾有魁樓倚天立金碧輝輝映城阿一從頽廢四十
年淒涼遺墟不堪過廣川惟中漫讀書長安陌上鮮鳴珂
明府吳公越之序來臨我牟惠政多痼瘵全甦廢皆興爰
勤鳩庀及時和斧斤雷動無頓呼瓦甍鱗集不加訶樓成
上與紫極連岡陵相對鬱嵯峨多士爭欲致青雲撫茲形
勢奮吟哦樓乎樓乎鎮常在明府德意應不磨

五言律詩

中牟道

明彭而述鄧州人布政使

濁流無定渡走馬逐風湍纔至河南岸始知薊北寒
隋隄

楊柳禿雪苑故宮殘廿載兵戎事行人掩淚看

城上示諸文學

張民表

固是絃歌邑驚傳戰伐場詩書豈灰燼勘定乃文章宵鼓
嚴聲冷春籥引勢長南陂新水長河漢接微茫

蒲蘆亭泛舟

張民表

積水盤渦滿浮舟曲渚遙犯星明滅眼牽浪淺深腰費日
勞茲事乘閒悟此宵天風秋更好須趁露波邀

細葦抽風韻團沙疊水紋鳧驚疑對過魚觸暗中分舟側
不容槳波生屢濺裙喧囂迷渡處昏黑坐相聞

寒水灼肝肺明星出復低未能別境外且向北城西問圃

他家有便身我意速市林空闊處亦可當幽棲
主人頗稱靜客到也如閒為有宅臨水應將臺作山登來
看杳杳涉處弄潺潺欲續滄浪詠思清好罷刪

退耕清上之田寄阮太冲 張民表

我久住清陽亭臯樹影涼友朋殊在念難黍未能將去了
纔三舍堆書滿一牀庭柯歸自盼重約醉青裳

憇水月菴

晉淑軾洪洞人邑令

此菴幽秀甚久矣著中年僧意雲山靜禪心水月浮焚鑪
憐萬姓滌慮想高秋何敢譚恭異攜琴且自遊

己亥夏從汴回憇水月菴

清沈荃華亭人副使

紺閣臨平野金鐙照上方寺幽宜水月僧老話滄桑竹外
薰風細松間日影長熙然此暫憇身世入清涼

中牟道上

徐延壽 閩縣人

曉別廩延路行行百里程山來中嶽近水入小河清官渡
曹瞞壘人烟管叔城野香吹不斷知是麥初生

昔日興亡事停鞭問水濱牛耕荒後地馬蹴戰時塵破寨
曾經寇空村不見人文章墓黃土特為吊安仁

鄭國有原圃蒼茫一望間低田多受水積土便成山跪乳
羊群白將雛雉子斑傳聞尼父氏曾此駐車環

汴河流不定梁苑望非遙隄決防瓠子車行載柳條客心

憂道路民力苦征徭魯令傳三異遺風似漢朝

哀李烈婦王氏

毛鳳翼邑人舉人

阿婆真不諒逼嫁日相侵懇父逢其怒拋兒割此心清操
能自潔正氣豈終沈蓬戶蒙旌典輝輝照古今

前題

冉覲祖

男子誰完節貞操有婦人綱常猶未墜血性此為真奪志
難違衆捐生信絕塵哀哀諫父語聞者共酸辛

娶也豈奇貨父兮利白金竟拚教子志早決狗夫心頸血

誰能灑井泉終自沈

自刎不死
夜復投井

牟山留正氣天地一蕭森

韓父母重構蒲蘆亭賦以誌喜 冉覲祖

遺愛深喬父芳型見此亭苔紋封斷石詩句帶餘馨不日
徵神造絕塵占地靈新流隨雨足吾欲問冥冥

東南城上魁樓落成

冉覲祖

雅意培風氣鳩工地効靈城高初聳碧郭近總環青影入
波中水光連天上星吾伊聲四起多士自橫經

訪官渡

桑調元

官渡知何處蒼茫想舊城曹袁遺壘失煙雨綠蕪平大地
幾龍戰空天一鶴迎無窮家國事物外詎關情

宿水月庵

許莢海寧人許州牧

暝色迷前路疎鐘出梵牆嚴城魚鑰靜荒戍馬蹄忙適口

依僧飯清心愛佛香不眠支倦枕蓮漏滴更長
浩劫恒河界茫茫去來因天邊迷昨夢物外悟前身問法
來支遁參禪坐許詢預愁霜月落明發又鎬塵

南征即事

王錫命溫縣人教諭

高下彌無際垂鞭任遠迤盡皆沙作嶺多是路成河星散
人煙少途窮鳥跡多臨深心益窄勒馬下崇阿

溝自河源發爭傳出佛潭如何成禍水不復作慈曇頽岸
噴砂磧迅流利駿驄年年秋雨至淹沒遍牟南

縣南丈八溝其源發

自新鄭出佛潭

自述

關克恭

秋苑花雖折

前清光緒己卯科中式本省鄉試舉人

春闈杏未援

六上公車

冷官充副鐸

前充西平縣訓導七年

褫職免覆盆

以學堂滋事同寅蜚語告訐撤任

職適逢河伯怒

河水大漲滔天其流南徙

不使郭田存

予灘地多塌郭姓今已坍塌始

盡此係借用

顏子負郭田絳帳新堂撤

學堂之事一概不問青氈舊座温

館仍就蒙

首陽薇共採

甘守窮歲

淡泊養靈根

山齋夜雨

清孫友梅歲貢生

夜氣寒侵骨山齋客夢回溪聲喧驟雨風勢助奔雷凄切

鳴檐角蕭騷傍枕隈朝來人乍起幽砌遍莓苔

山邨雨霽

前人

頓覺添佳景山村曉霽時嵐光含宿霧草色媚晴曦林鳥

衣猶濕崖花蕊半滋天然圖畫裏緩步自吟詩

七言律詩

魯令祠

明于謙錢塘人尚書

長民曾羨魯公賢民物熙然各遂天
境外遺蝗徒擾擾桑間馴雉自翩翩
閭閻風俗猶前日史傳聲華紀昔年
寄語郎官勤撫字循良衣鉢要人傳

瑞蓮詩為中牟令郝君賦

楊滋定興人御史

誰把紅幢種碧流風搖拂起浪沙頭
一編最愛濂溪說十丈休誇太乙舟
但借古泉興八政不妨瑞氣見雙毬
吾皇頒錄尋符紀先載人間第一休

魯公政廢邾公來喜見牟山瑞氣回綠水一灣終古在紅
蕖兩朵一枝開也知造物成神妙不是凡庸用翦裁嚼爾
畫工堪仔細圖模應得奉三台

瑞蓮詩和韻

黎臣 長壽人主事

深紅淺綠滿中流忽見奇花現並頭玩賞主賓開綺席喧
歌士女隔蘭舟葉翻小火檠青蓋房老高低擁翠毬信是
賢侯多異政感徵瑞物應天休

過中牟和壁間韻

省齊 沁水人

逶遲周道偏經巡到處窮簷不見春客久也憐裘葛散才
疎敢厭簿書頻半生踪跡紅塵舊千里風霜白髮新滿目

瘡痍成太息隨車無政答蒸民

喜晤中牟令王君美用壁間韻

李廷龍

湖廣人河南布政使

鄰是區馬復東巡民物熙和尚似春河浴已瞻行處好風
霜猶見往來頻循良政喜中牟舊獻納才需北闕新燕楚
天涯今晤語好將經濟慰生民

觀風憶昔幾經巡草樹光依滿路春豺虎有聲隨處遁關
河無限望中頻匡時愧我傳殫久戀闕還君對策新千載
明良逢盛會堯天舜日壽斯民

赴大梁臬副任過中牟韓莊示父老

王緘

文安人邑令

韓莊不改舊牟山攬轡重來鬢已斑父老尚能談往事兒

童強欲識衰顏未遑揖讓回問里深愧將迎滿序闌無奈
遮留頻駐馬河梁回首淚潺湲

再過中牟示士子

王緘

十年杯酒重論文曾許揮毫掃萬軍隱隱蛟龍天外見遙
遠牛斗日邊分并州故土應憐我沂水新春共喜君為問
門牆舊桃李班班玉筍已成群

赴蜀中任過中牟飲蒲蘆亭

喬璧星

臨城人邑令

紅塵紫陌走中牟問酒尋花幾度遊地湧靈泉滋古汴天
開勝景壯皇州灘頭父老來乘興岸上兒童任詠謳却喜
端陽時節近魚竿銷日好垂鈎

題見子臺故址

劉時中 邑令

名勝相傳見子臺
母投陂處脫凡胎
當年靜界非常遇
此地禪關自古開
水懺經翻風捲葉
沙門徑僻雨生苔
洞山往事今何在
空有鐘聲月伴來

題魯太師廟

歐學啟 長沙人 邑令

魯公經術漢明師
為厭承明出牧時
自是靈心調百順
豈緣異政見多奇
山河不改當年舊
今古猶同去後思
愧我重來無寸補
千秋遙自憶相知

寄題中牟劉司空懷二亭

朱之臣 成都人

黃河東走接青淮
卜築河陽景最佳
亭勢直爭中岳勝
雲

心惟有二人懷遠瞻岵岵天盈尺秀拂芝蘭風滿階從此
聲名壓阿里三槐作頌是吾儕

送劉司寇歸中牟

范良彥 虞城人御史

明發關心百感生故園松菊早尋盟
庭餘碣石思先澤家在滄洲薄吏情倦鳥投時秋
葉下懶雲停處暮山平林深迴去
人烟隔長日不聞車馬聲

宦海勞勞鬢影疎百年風水感懷初
偶因丹壑開新徑却喜青山是舊廬
石髓流雲和葉掃園蔬過雨帶經鋤
高春已罷聞山犬怕有蒲輪到隱居

虛亭遠應海潭幽大隱還從物外求
覓句偶然思夢草感

懷每欲賦鳴鳩馭回蜀道寧忘險表敵燕臺肯再遊維社
依稀風雅在歸雲常滿碧山頭

贈劉岐陽司寇致政歸中牟

侯恂商邱人尚書

誤入風塵鬢已霜息機今始解行藏烟霞有待身還健松
菊猶存徑未荒十畝閒居耆社近孤亭新起嘯臺旁知君
杖履盤旋處志在鳴鳩第一章

悠悠世路歎浮沉年老纔能返故林五夜頻回清壑夢千
山遙望白雲心溪聲鳥語琴隨弄竹氣花香酒共斟始信
先廬堪歎咏官遊何事晚抽簪

遙指烟蘿搆此亭筠牀高卧對山屏幾朝報主心猶熱今

日抽身夢已醒
樵牧相招皆勝事
免孫自課有遺經
中原回首成歸計
芳草萋萋色正青

魚倦長游鳥倦飛
歸心日夜向庭闈
小開水竹環精舍
閒種山花當綠衣
歌入南陔腸欲斷
夢來北闕事全非
家園此日秋光裏
多少芙蓉媚釣磯

小築初成擬六休
人間竟似有蓬邱
天開嵩少雲光迴
地接荆河野望收
老驥尚餘銜紲恨
孤鴻豈問稻梁謀
却因霜露思親淚
染就丹楓萬壑秋

劉岐陽大司寇歸牟山懷二亭

孫傳庭

太原人
都御史

圃田遺墅足幽棲
永慕寧堪納履遲
黃水岸橫官渡北
白

雲山繞吹臺西晚菘早韭園蔬好古檜蒼藤隴樹齊雄社
非緣娛老闕春秋霜露擁棖題

冉翁載酒過勞城樓

張民表

年逾七十久懸車同里交親復近居正苦衰逢戎馬起對
談興想飯牛餘一杯魯酒情相慰幾句唐詩意亦舒公事
私憂應可解便銷劍戟作耕鋤

簡西城同事邊道見張耒一

張民表

斗城西顧輔車同數轉燈光曲曲通盡漏虛驚春雁月不
眠起舞夜烏風大駝山動人驅馬官渡波搖劍宛虹何日
回郊還氣象便將杯酒破憂忡

元夜守城作

張民表

當年燈火熏宵漏今日烽烟動野燐
睥睨光驚斗極星河垂彩蕩城闌
袁曹雄長說官渡韓岳勳高紀汴人
獨倚女墻無可說慟思今古漫逡巡

送張子顧歸中牟

清周亮工祥符人侍郎

白水繽紛覆沅闌河干樺子淚沾巾
血痕亂灑程嬰傳潼汗平流李善身
恭敬瀆常依晶澤浮沉莫更憶江濱
如予多病難重見好慰波中望爾人

燕臺送徐存永之中牟

周亮工

七千里路苦相依三月長安雪更飛
共歎偕行人又去心

憐即別未成歸塵沙北地羈臣夢風雨黃河客子衣莫向
圃田詢古事安仁詞賦近全稀

徐孺將行不自知遙憐別路雨絲絲河干作客看楊柳馬
首逢人說荔支濁酒閒澆潘岳墓荒城先拜魯恭祠寒家
親串能相問為頌羈臣北雪詩

中牟對雪

金士忠 御史

誰栽玉樹向天宮風送瑤花飛滿空原圃不分鷗與鷺牟
山難辨柏和松豐年豫兆三農喜大有休徵四海同歲暮
不辭泥淖路征人何日出城東

牟山

蘇宏祖

牟峯突兀俯諸山，四顧微茫杳靄間。
曉日初昇先頽色，宿雲流盡忽蒼顏。
遙村錯落青千點，古木陰森翠一鬟。
神與天游時極目，御河影裏舳艫還。

白沙曉發

張學林

河陝道丹徒人

雪皜霜清月更妍，共成一色欲明天。
嚴寒客正衝三九，瑞兆農應卜十千。
踏凍不知泥有甯，迎曦漸覺屋生烟。
最宜僕射陂頭望，想像瀟漫泛白蓮。

吳友聖令君牟山署晤徐存永

王祚昌

雄才徐幹舊知名，同客相逢官渡城。
杵臼聯交看劍紫，圖書對酒射燈明。
槐涼院靜三更漏，月焰衙閒一榻清。
漫說

茂陵常帶渴主人時重故人情

牟志告成賦贈吳明府

蔡元友 蕭山人

亂餘草創費追尋採得民風感昔今天地大文雖在目山
川蘊義得於心關相國秦中籍出宰郎官宓子琴十志會
誇傳虎觀一編新又重雞林

牟城曉望

吳彥芳 閩縣人邑令

牟山低望一峯明幾曲河流見小清亭上蒲蘆秋水隔村
邊楊柳曉烟生農驅小犢開荒坂風送寒鴉下古城父老
殷勤無別語殘黎曾苦十年兵

謁魯公祠

吳彥芳

原圃城西拜古祠衣冠猶是漢鬚眉居民解說當年事後
輩徒深異代思豚酒筵前供伏臘雉雞桑下戲童兒先生
久著循良傳何用文章再勒碑

謁魯公祠

林繼煥

極目郊原半覆碑先生不朽獨歸祠飄飄遺範謚思永肅
肅丹楹仰止垂漢代幾更新日月牟民猶拜舊威儀即今
良牧稱慈惠知是流風百世師

牟城秋眺有感呈英明府

蔡元友

蒲蘆亭近小城隅水浸南天似鑑湖萬井烟銷多故壘十
村人靜半荒圖干戈欲定悲殘骨生聚初安賴碩膚有令

偏能修魯績催科不見病農夫

謁魯公祠時吳明府興重修之役 蔡元友

河墳北壅古荒祠三異循良百世師
草蔓桑枯馴雉在沙飛棟折漢尊遺衣冠想像非當日
伏臘低徊憶昔時仰止清風誰繼美
重輪應屬後賢思

初遊蒲蘆亭同賦

韓蓋光

高陽人邑令

搆得雲簷在蓼汀湖遊招客共揚舲
非從薄宦尋佳境為景前人愛野亭
曲曲新荷浮水碧遙遙嫩柳帶峯青
荷柳皆本植漁歌聲送斜陽晚遠近人家入畫屏

次韻奉和韓年兄遊蒲蘆亭之作 韓蓋光

桃李芬芳媚野汀，邀同載酒上虛舫。愛茲數頃皆深水，却羨中央一草亭。不盡鳶魚共玩賞，無邊雲樹足丹青。若非仙令重來搆，應少山光作翠屏。

過魯公祠

在縣西二十里

冉覲祖

司徒名姓遠相傳，拂讀殘碑識漢年。階受沙侵留鳥跡，像因人愛起爐烟。童嬉繡陌柔桑下，雉喚夕陽古道邊。民物熙熙猶未改，幾回翹首望時賢。

乙卯陽月遊蒲蘆亭步韓父母

曹之錦

儀封人

城外霜寒草亂汀，偶來縱目棹漁舡。當年喬子營初地，此日韓公拓舊亭。三里烟村疎樹紫，十尋雉堞斷雲青。群魚

似解遊人意跳躍西山錦繡屏

東南城上魁樓落成

邊惟謙邑人舉人

振興文事藉循良傑構巖巖起異方
鷓尾霞明通斗極城頭雲擁約天章
俯看湖水魚龍奮近接宮牆桃李芳
草舍聯翩爭鼓篋琅琅書韻逐風颺

前題

吳嘉珙邑人拔貢

魁星應是好樓居鴻構觀成物力餘
氣擁湖心披戶近霞橫天半射窻虛
翩翩冠蓋來遊盛藉藉郊原起頌初
試向膠庠覘士子藜光中夜照讀書

前題

較尉侯邑人貢監

城上初標百尺樓作人雅意足千秋天開筆陣阜山映地
湧墨池湖水流萬里風雲欄外起千家村落座中收頻來
登眺情無限看取奎光四達浮

謁魯公祠

孫和相

先生政蹟已迢遙卓異猶聞說漢朝百世豆籩今日昨三
春花柳昔時苗羊牛下括羞亭長穰桶翬飛看馴鷓嘉穀
原生方寸地化行自爾到垂髫

永興盛染坊開設辛莊

閻克恭

臨河勝地屬辛莊興盛嘉名錫染坊興作蔚藍種布漬盛
施卯色靛花香裁衣不尚歐洲白濯水先同土質黃從此

財源覘阜暢翩翩黼黻耀文章

其二

前人

周禮考工重染人凍絲漬羽鐘慌倫布拖雪白成功巧水
張藍設色新缸波漾漾先滌靛帛幅翩翩不滓塵慧手靈
心工點綴秦西皜素笑無因

春日山房即事

孫友梅

烟暖風和日放晴間來幽壑聽泉鳴探源直到雲深處摘
得山花不識名

經潘岳墓

孫和相

當年曾擲果盈車指點荒丘一子虛花滿河陽留治績喬

遷洛上識精廬不因文網輕羈縛何至門庭痛翦除舊史
誰譏趨世利歷來辭賦重璠璣

輓同寅卓懋修二首

王於藩山東人縣丞

幾歷星霜宦海同好從砥柱憶元功三春花汛泣殘雨五
夜柳隄咽素風論定蓋棺邀主鑒恩來旌典答臣忠幽魂
憑弔知何處淚灑洪流水自東

六年同事感知音磊磊聲華氣宇森大義輝揚先世澤鞠
躬盡瘁老臣心河干盛績垂星日泉下忠魂自古今芳躅
猶存人已沒慘聽流水不鳴琴

戊辰六月河決滎澤中牟適當其衝登城救護水及

城腰滿目流亡詩以紀苦

何鼎貴筑人邑令

西來濁浪欲浮天浩劫重經廿五年

道光二十三年中
年決口城鄉為墟忽

訝奇災傳瓠子又驚巨浸沒桑田馮夷怒擁千堆雪陸海

平沈萬竈烟愧殺宰官難障手一回悵望一潸然

扁舟一葉促歸程

時牟邑三堡險工余方奉
檄工次間驚得小船急歸

入耳奔騰萬

馬聲遍地鴻噉悲永夜滿天龍氣護孤城

時兩龍神
降在城中蕭蕭

禾黍空墟隴惻惻流亡半死生尚喜洪波能洗甲且消氛

稔慶休兵

時河南捻匪張逆合
數就誅一律肅清

戊辰九月放賑舟中雜詩

何鼎

千頃平蕪萬畝田重來愁見水連天村村雞犬憐今日處

處桑麻憶往年露宿尋常成澤國林棲三五是人烟商量

荒政無良策滿眼流亡媿俸錢

官渡橋

斷黍殘禾壓短蓬四圍水氣接空濛船燈明滅秋風裏鑿

火荒涼野寺中

災民避水多在野廟高起

破壘無人猶列雉

水所經處寨堡多隘

孤村有路只歸鴻艱難時事逢今日愁問桑經保障功

泊夜

孤帆阻絕水中央四面洪波激混茫待食饑民憐眾口傾

尊薄酒潤愁腸空林落葉秋聲急短榻殘宵夜氣涼兩鬢

霜華搔不盡年來減盡舊時狂

小潘莊阻風

賑船街尾繞村行岡阜波池一瓦平尚有殘荷擎夜雨

蔣冲

一帶向多荷
池皆陷沒矣
更餘衰葦戰秋聲
人家近岸依魚活
臨水各

水後皆以霜露催寒
驚雁鳴無衣野哭不絕
憂患事多

難盡寫何如歸去學躬耕

塘葦

水轉帆回面面風

所行皆平原積水

扁舟儼在畫圖中沙

鷗影小浮孤白野柿林深隱亂紅種麥有人爭尺土

水微落鄉

民爭布麥種為裂縫麥

看花無興冷秋叢

時暑齋菊花盛開亦不暇賞矣

晴波如鏡

渾無際壘塊何曾一洗空

茶菴

五言絕句

牟山

周淑琚女士

獨立牟山上青天
手自擎舉頭紅日
近繞足白雲生

中牟郊行遇雨

薛正清

驟雨兼驚風烏雲走
太空中原多戰事
邑里半沙蟲

其二

迤邐經岡嶺蒙茸披
草萊樵夫莫剪伐
珍重棟樑材
以上詩三首民國二十三年錄入志

七言絕句

馬陵岡

唐胡曾

墜葉蕭蕭九月天
驅兵獨過馬陵前路旁
古木蟲書字記
得將軍破敵年

官渡

張孟男

馬頭落日帶沙黃
此是曹袁舊戰場
人過斷橋頻吊古
水聲嗚咽哭興亡

食舊

張民表

食舊堂前嘉客存
百壺清酒歌相喧
玉杯不染黃流水
却愛吾家老瓦盆

懷中年舊事再送存永

周亮工

圃田郭外葦蘆新
艇子從人泛早春
記得南陂榴苑事
廿

年不敢怨風塵

余曾讀書中年張林宗先生之
榴苑嘗從林宗泛舟蒲亭

蒲蘆亭

清

王士禎

新城人尚書

南郭孤亭野水濱
菰蒲獵獵水鱗鱗
林宗未遠風流在
不愧亭名是墊巾

官渡

王士禎

別駕亡來萬事非
夕陽官渡客行稀
袁家新婦應惆悵
賸與陳王詠宓妃

板橋

王士禎

板橋衰柳日蕭蕭
回首宣和似暮朝
上巳金明池上飲
畫船銜尾駱駝橋

過中牟贈吳友聖令君

談允謙

中牟兵過未畊鋤城邑初開賦不除千古魯公三異政
從今後不勝書

宿水月巷

張學林丹塗人廵道

一路蜩聲送馬蹄落霞幡影綠楊西解鞵又借花宮榻
心
事逢僧不忍題

渠是栖栖戀稻梁祇今真作觸藩羊夢回殘月空廊白
愛
聽鐘魚出短牆

宿水月巷和壁間韻

鄂順安滿洲人廵撫

黃塵院外逐輪蹄流水斜陽萬樹面打火敲門禪味好不

須詩向板橋題

板橋

張學林

板橋無恙枕盤渦
柳未舒條水未波
行到忽教板觸著
者回五十九經過

又過板橋

張學林

津頭又幾過
征輪柳色耗
耗一換新
二十四番風欲盡
春寧知我我傷春

官渡橋

周淑珺女士

也無官渡也無橋
化作烟村柳萬條
若問其名還似昨
空存三字到今朝

以上詩一首民國二十三年錄入志

八景詩

牟山北峙

縣北牟山

王觀生 懷慶人訓導

尋幽數里一峯生
水碧山青拱縣城
佳氣鬱蔥看不盡
常留春色向梁京

海潭秋月

縣內海子橋

牟陽城內海潭清
秋月澄空夜自明
獨倚斷橋閒問水
幾經離亂幾經兵

龍池靈應

禱雨處在城隍廟後

鹵北城隈綠水漣
相傳禱雨有靈淵
碧翁偏念牟民苦
故遣神龍灑醴泉

龍脊重樓

倚內龍脊山上建重樓

牟城縣治似龍蟠霖雨千家浩澤漫春到懶來登畫閣農桑日課有餘歡

興國晚鐘

每夜自鳴

欲遠塵心一錫揮疎鐘風送冷漁磯兵戈何事不摧折古寺猶存衲子衣

魯祠晴暉

漢魯仲康祠在西關

循吏從來重魯勲牟陽三異口碑芬祇今政績誰相似喜有秦人殺使君

土山迎翠

縣南土山

荒城芳草自萋萋春日晴雲傍野谿寄語黃鸝勤織柳雙
柑載酒聽君啼

聖佛仙境

聖佛岡相傳有僧幻出一寺以留故人及別化為烏有

風傳岡上有招提青靄回看路已迷當日祇園今已矣至
今春草為誰萋

龍脊重樓

丹觀祖

攬勝蟠龍脊巍巍百尺名絃歌通巷陌霄漢倚檐楹地迴
千家小天開四野情自公時眺翫民事最關情

興國晚鐘

人靜傳更漏鐘聲初動時偶聞似有擊不識出阿誰過院

微風引入宮清磬隨於今有寶地寂寞對沙彌

魯祠晴暉

廟貌儼千祀行人紛拜趨雲霞燦畫壁香藹散金鋪老樹
扶疎影巢禽次第呼仲康如可作還以庇吾徒

聖佛仙境

當年留客處久矣失招提蒼樹遙天接黃沙小徑迷歸雲
幾縷斷飛鳥數聲啼乘興時驅馬詩囊負小奚

龍池靈應

不審龍何在相將禱綠波雲興忽變巖雨下已滂沱共說
祥能應祇緣天自和一邱存勝蹟父老有遺歌

土山凝翠

層崖翠嶺滴偕友一登臨苔厚行無迹林疎聽有音嵐披
古寺隱沙擁大陵深歸路饒清賞牧兔犢背吟

海潭秋月

澄潭駕彩虹印月渾如空一碧水天合雙輪上下同碁聲
急北渚雁影墮西風不畏沾衣冷徘徊玉露中

牟山北峙

山勢倚河起蒼崖俯碧流臺池環近郭禾黍接平疇曹壘
空遺跡隨渠不為舟廢興閱往代自古鎮中牟

牟山北峙

王祚昌

名山不在近雲霄環拱逶迤北望遙最喜畫屏相映帶嵐
光午靜見危橋

海潭秋月

月映城潭徹底清每逢秋到更光明橋餘瓦礫遊人少勝
侶誰為阮步兵

龍池靈應

瘞來圭璧共陳辭仙令城通甘雨隨畢竟政和靈異見賢
人心境有龍池

龍脊重樓

聚沙成背起危樓烟霧騰空瑞色浮但得從今元氣復龍

蟠隱隱舊中牟

興國晚鐘

巍然梵刹聳南墉
聞說當年金碧重
舍利久湮頻亂後
沙彌時撞晚來鐘

魯祠晴暉

漢代傳令俎豆輝
晴光猶照魯公衣
漫言慈愛從來少
又見吳君起式微

土山迎翠

沙隄繞郭遍青山
芳樹迷離薜荔灣
秋霽登城頻野望
賢侯新政有餘閒

聖佛仙境

蘭若曾聞在遠岡，須彌何處覓雄王。即今曲水通幽徑，宛是當年鷲嶺長。

龍脊重樓

張麟趾

飛樓縹緲路層巔，矯首平臨尺五天。一曲琴聲山盡響，此中疑有伏龍眠。

興國晚鐘

古刹應於亂後興，石幢猶刻宋時經。上方月出諸緣靜，一院鐘聲餉老僧。

海潭秋月

一水波泓漾月清潭中不減鏡中明
我來作客逢炎盡恰值秋光到處生

魯祠晴暉

漢臣異績在中牟廟貌摧殘一像留下馬
摩挲碑字古前山殘照未曾收

土山迎翠

爽氣朝舒復暮披登樓秋望總相宜
南窻高卧悠然見秀色青青亦自奇

聖佛仙境

誰云作佛不如仙爭羨招提色相妍
閱盡滄桑如一夢至

今猶有好名傳

龍池靈應

五風十雨有年書何事陳辭早魃祛今日吳公多治行甘霖無處不隨車

牟山北峙

孫和相

嵐烟鬱鬱復蒼蒼遠應七星直巖水旁疑是奇峯天外落移來郭北鎮牟陽

龍脊重樓

龍脉盤旋枕雉城樓臺叠峙倍崢嶸公餘饒有登臨興琴韻悠揚對月明

聖佛仙境

如來何事結塵緣
漫駐平岡作洞天
色色是空空即色
休將幻境憶當年

海潭秋月

潭映月明景自清
秋光正喜滿牟城
橫橋好接霓裳舞
莫認鮫人淚一泓

興國晚鐘

太平肇建已非新
古刹猶存丈六身
遙度鐘聲明月夜
夢中驚覺悟前因

龍池靈應

曾聞當日甘霖零五色雲峯起北溟自是聖朝多雨露故
教神物顯幽靈

魯祠晴暉

日麗風清正堪娛西郊爛熳瑞雲鋪漢賢芳蹟今何在
雅子祠前看雉雛

土山凝翠

一帶疎林半罩苔土山繚繞勢崔嵬無邊野綠紛如織好
是鴛鴦逐影來

魯祠晴暉

辛來弼邑人庠生

循良祠宇近牟城佳氣葱蘢映晚晴三異刻章邀主鑒千

秋祀典答臣清曾從虎觀陪經席更羨魚頭繼直聲遺愛
猶留庭下樹士人瞻仰拜神明

聖佛仙境

漫道天台事渺茫奇觀久羨在平陽浮圖偶現成精舍過
客俄驚到佛場僧榻款留聊信宿人間幾度隔滄桑回頭
重認來時路漠漠黃沙千仞岡

龍脊重樓

公解藏山境地寬岡巒回繞似龍蟠重樓百尺臨岩起小
閣三楹過雨寒半畝蒼苔連石砌一庭空翠撲雕欄政閒
應有登臨趣好取瑤琴對月彈